

Zeitschrift: Schwyzerlüt : Zyschrif für üsi schwyzerische Mundarte

Band: 23 (1961)

Heft: 1

Artikel: Zerhiiti Wäld

Autor: Streich, Albert

DOI: <https://doi.org/10.5169/seals-188989>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 08.08.2025

ETH-Bibliothek Zürich, E-Periodica, <https://www.e-periodica.ch>

Du bischt

*I mag syn waan i wil,
diheimmen, im Wirtshuus, ir Straass,
i mag tuen was i wil,
mid Gieti, mit Schlääwwi, im Hass —
geng umhi han i es erchennd,
bischt Du daa und bietischt mer d'Hend.*

*I mag gahn waan i wil,
äbewwägs, den Bäärg uuf old bäärgab,
i mag gsehn was i wil,
Tagheitri, de Mmodrich von em Grab —
geng umhi han i es erchennd,
bischt Du daa und bietischt mer d'Hend.*

*I weis nid was Du bischt,
nid Namen no Woort chunnd mer z'Raad.
I weis e i s : Ohni Di
erlischt mer all' Gieti und Gnäd.
Blyb bieemmer drum, Du, dyner Hend,
und leit mi undträäg mi bis z'End!*

Zerhiiti Wäld

Ds Annelli ischt Ziji Menkes am Hobacher di Iingscht. Äs muess eerscht ds ubernäächscht Jahr z'Schuel, ischt es läbigs Dingelli mit runde Wwange, lluuterblaawwen Eugen, hed schier es Obsinäsi und den en Huwwel rupps Haar, waa uf d'Reeti ziehd. Einewwäg isch es afen eso groosses und tifigs, dass' weis, äs ischt epper, und di Groossen achte si siiner, wesstwägen ihns d'Mutter o schoon elleinig uusi laad und um ds Huus um stunggellen.

Eis Tags im Merzen, d'Sonnen hed afen umhi

stiiff mege ggwäärmen, erleubt ihm d'Muetter, ds Mämmiwägelli vor ds Huus z'nähn. Das hed ihms chennen! Derwiilet d'Muetter d'Ruschtig i ds Wägelli tued, ds Techelli, ds Chissi, den Matratzen, ds Mämmi sälben, zwirbled und holoojed äs us luuter Freid um sa um, ggumped ihra undre Fiessen umha bis di ganz Fuehr entli binenandren ischt und gräch, fir uus z'ziehn.

D'Reis geid voor ds Huus uf di sunnewwaarm Bsetzi. Dert stoosst ds Annelli ds Wägelli dhinnet-und-thar, von eim Huusegg zum andren, scheenn hibschli und langsam, eppa wie's es der Muetter hed abgseh ghäben. Uf der Stell wurd ihm das Zaagg aber z'lengwiiligs; due schleipfts ds Wägeli etwärischt über d'Bsetzi gäg em Gaarten anhi voor ds Gaarteteerli, waa di läärren Escht von em aalten Hollderbeun druberanha recken.

Hindrem Teerli gropped e Chatz. Ds Annelli macht gäg därren: «tschu-tschu, beesi Chatz!» bis diee mid verträjtem Sack si dem Hag nah dännaziehd; de faads an, d'Mämmiruschtig us em Wägelli emmuusa z'ruummen und wiee si dahar chunnd dir en Boden uus z'ghijien.

Zlescht ischt ds Mämmi an der Reien. Das muess aber nid am Boden. Dr Annelli nimmts im beed Hend, stitzt si uf d'Zeeiji und probierds zwischet de Schiilen obna uf em Gaarteteerli z'bchlecken. Das graated entli. Und nu sitzt ds Mämmi mit dem roote Rockli uf em Teerli, hed ds Grindschi frehli uuf, streckt d'Äärmeli z'beide Siite ggredi uusi und lächled derzue, dass' i purzelliinege Wwänglenen Griebleni gid.

Ds Annelli hed Freid. «Uhui, Muetter!» riefts, «chun acht eis ds Mämmi! Ds Mämmi cheu ja ohne häblegen uf em Teerli sitzen!» Es tuucht ds Annelli, d'Muetter sellti das o gsehn; aber diee ischt nienam haumha.

Und etz firweis ächt, wie das ischt chon?

Undereinisch faad ds Mämmi uf em Teerli uehi
afaa plampen, chunnd i ds Ungreis und stitzt su leid
es's mag abha, uf Bsetzi. Plätsch! hed ds purze-
liinig Grindschi gmacht, ischt i Spriissi zerfahren.
Und ds Mämmi ischt halt e gheis rächts Mämmi
meh!

Ischt das Annelli erchlipft!

Im eerschten Aputsch cheu se si nummen niimma
weiggen, e ghei Mmux gids von ihm. Vellig von
ihm sälbe stuunets voor ds Gaarteteerli am Boden,
stuuned und stuuned.

Was ischt emel o esettigs?

Es vergeid des Raschli, da niisched e Tschuder ds
Meitschi bis oben uus, und es laad e Päägg ab, su
luut wie'l nummen geid:

«Ds Mämmi ischt zerhiid!»

Dernah brieleds eis-der-furt, es wes es niemeh
wellti gän, und Träne chrugellen ihm nummen eso
us en Eugen, über d'Wangen ab.

Der eerscht Mentsch, waa vo ds Annellis Chummer
eppis vernimmd, ischt der Groosatt. Är hed im Schopf
näbe zueha tannig Chnurtsche gschiitred und ischt,
su raass wie-n-er mag, cho springen, und es ischt
ihm no schier uf em Aate, wwaan er ds Meitschi
choored?

«Was is's jetz? Was heds eppa ggän? Was mue-
lischt eso?»

Es zerschriisst ds Annelli fascht voor Eelend, waa
's es seid;

«Ds Mämmi ischt zerhiid!»

Es geid ihm halt teiff, griiselli teiff.

Der Groosatt ischt suscht en Gueta, bhietis, und e
Lleuba. Är gscheuwwed das Hiifli Eelend vor ihm,
macht gspässig Muuleggi und überchunnd näben
Eugen eso chliinn Runzelli, waan er seid:

«Hija, jetz wägem Mämmi bruuchscht niid eso
z'tuen; hättischt bas Soorg ghäben! Jetz is's halt
esoo — zerhiids!»

Mid nassen Eugen, Angscht und Elend im Gsichtli
bättled ds Meitschi:

«Groosatt, cheuffischt mer den es anders?»

Aber der Grossatt rickt an der schwarze Zottelchapp
pen uf em Heut umha, es wen ihm diee nid passti,
striicht mit dem rächte Zeigfinger über e bbognen
Naserrigg uehi, überchunnd es äärischts Gsicht und
macht Uusflichti gältend: es Mämmi z'cheuffe
choschti Gäld in er Ziit, waa mma mangleti z'huusen.
Waruf ds Annelli vom Groosatt verlangd — und
Träne lleuffen ihm bächliwiis:

«Su hilf mer doch o pääggen!»

Das tued dem Groosatt den doch d'Muuleggi umhi
zweiggen und di chliinne Rrunzelli näben Euge
virha. Dem Meitschi hälfe pääggen? Am End wurd
eppis nitzen! Und wirkli nimmd er den Nasellumpe
virha, riibt dermit in Eugen, macht «huhuhu» der
zue, so gued dass' geid und schnipft und schniizt,
es wen ihm Äärischt wää. Schliessli, wes niid
choschted und lift Häärzeleid us der Wäld tuen,
worum o nid?

Das gid der Groosatt gued!

Vo Ziit zu Ziit blinzled er den über e Llumpen uus
nah em Meitschi. Das blieled eis-der-furt ds luuter
Wasser:

«Uhuhuhu, miis Mämmi, miis Mämmi!»

Der Groosatt hilft: «Das aarm, aarm Mämmi!»

Den umhi ds Meitschi: «Zerhiid isch es, zerhiid!»

Und der Groosatt: «Z'Hudlen und z'Fätze zerhiid!»

Und jetz gscheuw w emel o! Bi lengem faads dem
Annelli afa lluggen, geid der greescht Chummer
verbii. Es setzt si am Boden, siinelled nummen no
eso vor ihns hin und schnipft.

Und der Grossatt schnipft o nummen no. Hindrem
Nasellumpen isch er gottefroh, dass diee Gschicht
bennd an es Boort chon. Är hed scho gchummred
ghäben, er purschtis nid änenuus.

Entli und am End hed ds Meitschi uuf, list d'Mäm-

miruschtig z'sämen und muschtred sa umhi i ds Wägelli. Ds Mämmi sälbe mmid dem zerhiiten Grindschi nimmdu uf d'Äärmeli, weiggeds hin und wider, singt ihm «beuww-beuww-beuww-beuww» und schickt si nah-dis-nah rächt gued umhi drin.

Etz chennti der Groosatt zrugg a siin Arbeit. Aber ja, där! Uf enen Aaart isch ihm ds Meitschi s Wehtiendi halt gliich zuehiggangen. Waa ds Annelli eismaale mmid de Fingerlenen in allem boorgen über ds Mämmis zerhiit Grindschi striicht und derbiee no eis ganz wiilweichs wurd, wurd är o murba, nimmd ds Meitschi bir Hand und geid ihm schnuerstracks i Lladen näbefir gen es niwws Mämmi cheuffen.

D'Groosattega sii teich eso: eifäältig Grittega, aber den doch grad rächt, nem jungen Annelli e zerhiiti Wäld umhi z'reisen.

Useme Vortrag vom Albärt Streich a der Volkshochschuel Thun

(24. Hornig 1960)

Wie-mma zum Dichten chunnd, cheun-i nid sägen. Faads mid dem Rhythmus an, waa schliesslich in allen Dingen ischt? Isch-es es starchs Empfindigsvermegen und darmid en starchi Erläbnisfähigkeit dem Läben und der Sprach gägenuber? — *Eis* ischmer uufgfallen, wen i han schriftiitschi Gedicht gschrieben: D'Sprach hed-si der Empfindig nid wel- len underziehn, i han ds Schriftiitsch geng gschpirrd wien en Aart eppis Fremds, eppis waa dem Härz nid rächt hed wellen folgen, wyl-i äben in der Mundart teicht und ggläbt han, in der Muetter- spraach. Was Jakob Bührer über das Gedicht «von den Sternen in den Himmelsfernern» gschrieben hed,